

四庫全書

史部

欽定四庫全書

史部

至元嘉禾志卷一

一至五

詳校官編修臣曹振鏞

檢討臣德生覆勘

總校官降調編修臣倉聖脉

校對官編修臣盧遂

騰錄監生臣朱腹松

欽定四庫全書

史部十一

至元嘉禾志

地理類三

郡會郡縣之屬

提要

臣等謹案至元嘉禾志三十二卷元徐碩撰碩里貫未詳始末亦無可考其作此書時則方官嘉興路教授也秀州自宋初未有圖經淳熙中知州事張元成始延聞人伯紀初為之後岳珂守郡復延郡人闕棫續修會珂改

調事遂中輟僅存五卷至元中嘉興路經歷單慶屬碩纂輯因踵棧舊本續而成之廣其門為四十三而卷數增多至二十有七志中兼及松江府華亭縣蓋元時本隸嘉興路明初始析置也其書叙次甚詳每條下間繫以考證尤為典核而碑碣一門多至十一卷自三國六朝以迄南宋凡石刻之文悉全載無遺如吳征北將軍陸禕碑梁秦任山碑唐黃

州司馬陸元感陳府君環墓銘宗城令顧謙
墓誌皆歐趙所未著錄吳越靜海鎮遏使朱
行先碑吳任臣十國春秋實據以立行先傳
其他零篇斷什為耳目所未覩者尚多殊足
為考獻徵文之助惟書中但有人物及進士
題名而不立官師一志使前人宦績缺然無
傳未免漏畧又江海湖泖浦溆溪潭陂塘河
港涇溝堰埭分為八類使源流支絡開卷井

然體例甚當而樓閣堂館亭宇亦分為三類
強析名目未免失之瑣碎是其所短焉乾隆
四十六年五月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

至元嘉禾志卷一

元 徐碩 撰

沿革

嘉興路九域志曰上秀州古揚州之境也周時為吳國
釋名曰吳虞也即太伯避季歷之地吳伐越越子禦之
檣李檣李即今嘉興也舊有檣李城魯定公十四年春
秋書越敗吳于檣李至哀公元年吳王夫差敗越于夫

椒報樵李也按此則知樵李者吳越之戰地也周顯王四十六年楚威王伐越破之盡取其地至於浙江之北故此地亦名曰楚杜佑通典云吳滅屬越越滅屬楚是也又吳錄地里曰吳王時此地本名長水故嘉興亦名長水秦始皇東巡望氣者云五百年後江東有天子氣始皇至今囚徒十萬人掘汙其地表以惡名改之曰由拳又按寰宇記云始皇東遊至長水聞土人謠曰水市出天子從此過則人乘舟交易應其謠遂改由拳縣又

曰故由拳山在縣始皇見其山上出王氣使諸囚鑿此山囚倦並走因號為囚倦山置囚倦縣後人訛為由拳水經云秦始皇改為囚倦亦曰由卷西漢屬會稽東漢屬吳郡吳黃龍三年由卷野稻自生改為禾興志瑞也赤烏五年因立太子和改為嘉興晉宋齊梁因之隋平陳置蘇州廢嘉興入杭州唐武德七年復置屬蘇州八年廢入吳貞觀八年復置屬蘇州晉天福四年錢元瓘病支郡多闕而右藩强大始經邑為州遂奏以嘉興

為秀州絕其華亭海鹽二同地附於州乃以境西義和聚為崇德宋政和七年八月二十二日改秀州為嘉禾郡寧宗慶元元年以是邦為孝宗毓聖之地陞嘉興府嘉定元年十一月因守臣趙希道奏請賜嘉興軍額

聖朝至元十三年正月改為嘉興府安撫司至元十四年三月改為嘉興路總管府領府一縣三司一

錄事司城以內隸馬宋置南北西三廂聖朝至元十三年廢遂置兵馬司至元十四年改為錄事司

松江府舊華亭縣也唐天寶十年置華亭縣屬蘇州治
按新史寰宇記以為本嘉興縣地輿地廣志以為本崑
山縣地元和郡國圖志云吳郡太守趙居貞奏割崑山
嘉興海鹽三縣為之今四境與三縣接郡國圖志為不
誣矣唐僖宗入蜀時郡盜盤結王騰據華亭其後吳越
王錢鏐遣顧全武拔之自此地入吳越按通鑑乾寧四
年錢鏐遣顧全武取蘇州乙未拔松江戊戌拔無錫辛
丑拔常熟華亭是也晉天福五年以嘉興縣為秀州而

割華亭隸焉通典寰宇記云地有華亭谷因以為名輿地志云吳大帝以漢建安中封陸遜為華亭侯即以其所居為封谷出佳魚蓴菜又多白鶴清唳故陸機歎曰千里蓴羹未下鹽豉及臨刑嘆曰華亭鶴唳不可復聞又按陸遜傳云遜初封華亭侯進婁侯次江陵侯漢法十里一亭十亭一鄉萬戶以上或不滿萬戶為縣凡封侯視功大小初亭侯次鄉侯郡侯以遜所封次第考之則華亭漢故亭留宿會之所也昔縣有華亭鎮印或者

遂謂自鎮為縣不知所謂鎮者唐因隋制置鎮將副以
掌捍防守禦之事縣之冗職耳祥符圖經載鎮在西南
二百步而元豐九域志則廢矣如自鎮而為縣則新史
輿地志諸書不應畧而不言也若夫雲間之名則自陸
士龍對張茂先所謂雲間陸士龍一語得之也華亭民
物稍蕃庶烟火萬家絃誦之聲相聞遂為東南方輿區
聖朝至元十四年陞為華亭府至元十五年改為松江
府領縣一華亭

嘉興縣唐史九域志云望嘉興縣輿地廣記叙秀州以
為春秋時吳越分境於此杜預曰嘉興縣南有槁李城
今之嘉興縣境吳之南境也秦為由拳縣西漢地理志
注云柴辟又云就李水經云辟塞皆舊名也漢以後中
間沿革詳見本路所載矣晉天福五年陞嘉興為秀州
寰宇記云嘉興監者今秀州嘉興縣煎鹽之所宋陞為
監後併為縣而隸秀州焉其先三十二鄉熙寧中析五
鄉隸崇德止二十七鄉今仍舊

海鹽縣輿地志云上海鹽縣唐地理志曰蘇州海鹽
九域志曰望海鹽秦郡縣天下粵二十年甲戌置縣屬
會稽郡漢因之地理志云武原有鹽官寰宇記云廣斥
鹽田相望即海鹽鹽官之地吳王濞置司鹽校尉居馬
嗶城故水經云吳王煮海為鹽於此縣也王莽時改為
展武後陷為湖是為柘湖湖中有山生柘樹因名焉今
在松江府南七十里金山北移治武原鄉為武原後漢
復為海鹽順帝時又陷為湖是為當湖遂移治故邑山

為故邑縣晉成帝元康七年復為海鹽縣又移處故為
卑城至陳武帝割屬鹽官唐高祖武德七年復屬蘇州
太宗貞觀元年省入嘉興睿宗景雲二年復置先天元
年廢二年百姓以應奉塗遠艱於往來又請置明皇開
元五年蘇州刺史前黃門侍郎張廷珪奏是年五月敕
置即於舊海鹽縣吳禦越城西北立定準而置縣今縣
治也昭宗大順中割歸杭州晉天福五年置秀州縣隸
焉宋因之今仍舊

崇德縣九域志云崇德縣古越地也輿地廣記叙崇德云有語兒水亦曰禦兒越之北境也魯定公十四年吳伐越越子句踐禦之陳於檣李

杜預曰吳郡嘉興縣南有檣李城今禦兒接界

吳越春秋句踐五年入臣於吳羣臣祖道至浙江上是
浙江之西皆入吳境句踐七年既釋囚反國厚獻吳王
夫差夫差悅之賜書增封於是禦兒復為越之北境國
語曰句踐之地南至句無北至禦兒

韋昭注今嘉興禦兒鄉是也

句

踐之報吳也徙舍至於禦兒大夫種曰吾用禦兒臨之

韋昭注御兒越北鄙言吳邊兵若至吾以御兒之民臨敵魏明帝時王景淵諫營宮

室亦曰句踐欲廣其禦兒之疆馘夫差於姑蘇釋之者

謂禦兒吳界邊戍地名斯可驗矣

太平寰宇記叙杭州云越國之西境西北

至禦兒分界在吳郡嘉興縣南乃指斯時也

句踐滅吳傳六世為楚威王所

併地屬楚秦郡縣天下總吳越舊地置會稽郡禦兒為

由拳縣之西鄙介於錢塘烏程之間漢武帝時伐東粵

東粵使徇北將軍守武林樓船軍卒錢唐棣終古斬之

元封元年閏四月封語兒侯

孟康曰越中地也今吳南亭是顏師古曰語或作禦

其音同 考之唐乾符中所立崇福寺二石經幢一云嘉興

縣語兒鄉一云語兒市然則語在唐其名如故黃巢之

亂豪傑起義兵保護鄉井遂陞為義和鎮餘杭吳公約

隨董昌禦巢於西鄙奏置都額於硤石兼授義和鎮遏

使後其子重裕襲拜西佳鎮遏使兼義和鎮事

見羅隱
撰吳公

約碑吳越有國廢鎮止稱義和市塘左則語兒市三朝國

史云有語兒亭故地名語兒按水經載萬善歷曰吳黃

武六年正月獲彭綺是歲由拳西鄉有產兒便能語云

天朗河欲清脚析金乃生因詔為語兒鄉非也又嘉禾
百詠載舊傳西施產兒於此至能語方去尤可笑也蓋
語兒當為禦兒晉天福間始析崇德七鄉置縣於義和
市因鄉以名縣五年春三月勅嘉興縣為秀州以崇德
縣隸焉宋因之熙寧十年又割嘉興縣梧桐永新清風
保寧千金五鄉以益之總十二鄉今仍舊

星野

周官保章氏以星土辨九州之地所封封域皆有分星

以觀妖祥故志邑郡者必考焉西漢地理志曰吳地斗分野也又曰越地牽牛婺女之分野也晉天文志曰自南斗十二度至須女七度為星紀於辰為丑吳越之分野屬揚州費直起斗十度蔡邕起斗六度度又列州郡躔次云丹揚入斗十六度會稽入牛一度由此觀之嘉興乃斗之分野而崇德處吳越之間則獨在斗牛躔度之交按五代史載豫章人有善術者望牛斗間有王氣語錢唐分也宋建炎初國步艱虞是秋占者望斗牛間

有紫氣既而移蹕維揚謂其已驗暨冬十月戊寅孝宗
虹渚之祥實在嘉興非其明驗歟故備載之以俟知星
者

道里

嘉興路

東西三百二十八里

南北九十一里

至上都

陸路四千三百八十四里

水路四千一百里自大都登陸路至上都四千

九百里

至大都

陸路三千五百八十四里

水路四千一百里

四至

東至大海二百一十里

舊經云一百九十七里

西至杭州路二百一十九里

南至杭州路硤石鎮界六十里

北至平江路吳江縣界三十里

八到

東南到海九十二里

舊經云東南到海鹽九十里

西南到杭州路鹽官縣界一百里

東北到平江路吳江縣界六十里

西北到平江路吳江縣界四十二里

陸路

東至松江府一百二十里

西至崇德縣九十五里五十步

東南至海鹽縣九十里

舊經云八十里一百步

西北至平江路吳江縣一百一十一里一十步

水路

東至青龍鎮一百九十五里

西至湖州烏程縣界七十里

南至海鹽縣九十里

舊經云八十里一百步

東北至平江路吳江縣一百一十一里一十步

松江府

東西一百六十里

南北一百七十三里

四至

東至海八十里

西至平江路長洲縣八十里

南至海九十里

北至平江路崑山縣界八十里

八到

東南到明州界九十里

在海中

西南到海鹽縣界六十里

兩縣相去一百二十里

東北到平江路崑山縣界一百二十里

兩縣相去一百

二十里

西北到平江路崑山縣界一百五十里

兩縣相去二百

陸路

西南至嘉興縣界六十里

東北至青龍鎮五十四里

水路

東北至青龍鎮入吳江五十四里

西南至嘉興縣界六十里

西北至吳江六十里

嘉興縣

東西七十里

南北八十里

四至

東至松江府華亭縣風涇界六十里

西至崇德縣官窰鋪五十里

南至海鹽縣莫涇鋪四十五里

北至平江路吳江縣界二十里

八到

東南到海鹽縣界四十五里

西南到崇德縣界官窰鋪五十里

東北到平江路吳江縣界七十里

西北到崇德縣烏青鎮五十四里

陸路

東南至海鹽縣界莫涇鋪四十五里

西南至崇德縣界官窰鋪四十五里

舊注云至崇德縣九

十里

東北至松江府華亭縣界風涇鋪六十里

舊志云至

華亭縣一

百二十里

北至平江路吳江縣界遞鋪三十里

水路

與陸路同

海鹽縣

東西一百五十九里

舊志云一百九里

南北一百三十三里

舊志云一百三十二里

四至

東至海五里

舊志云三里

西至杭州路鹽官縣六十三里

南至杭州路鹽官縣四十八里

兩縣相去九十五里

北至嘉興縣界七十三里

八到

東南到海二里

西南到杭州路鹽官縣界五十里

東北到華亭縣八十九里

西北到嘉興縣界松楊涇四十五里

陸路

西南至澈浦三十六里

西北至嘉興縣界四十五里

水路

東北至當湖五十五里又北行至華亭縣九十

里

西南至澉浦鎮三十六里

西至杭州路鹽官縣六十三里

西北至嘉興縣界四十五里

崇德縣

東西五十四里

南北三十五里

四至

東至嘉興縣靈宿鄉界六十里

西至湖州路德清縣金鵝鄉界十五里

南至杭州路鹽官縣昌亭鄉界五里

北至湖州烏程縣移風鄉界二十里

八到

東南到杭州路鹽官縣元吉鄉界一十里

西南到湖州路德清縣金鵝鄉界二十里

東北到嘉興縣靈宿鄉界六十里

西北到湖州路歸安縣太元鄉界三十里

陸路

南至杭州路鹽官縣界五里

東北至嘉興縣界五十里

舊志云
六十里

水路

東北至嘉興界南谷湖五十里

西自縣西長營涇至德清縣界苧里涇一十五

里

南至杭州路鹽官縣界五里

北自縣北長營涇至湖州烏程縣界三十里

風俗

舊經云罕習軍旅尤慕文儒不憂凍餒頗勤農務

題名記云惟秀介二大府旁接三江擅河海魚鹽之利

號澤國杭稻之鄉土膏沃饒風俗淳秀文賢人物

之盛前後相望百工衆技與蘇杭等

方輿
勝覽

前漢地理志云江南地廣或火耕水耨民食魚稻以漁

獵山林為業果蔬羸蛤食物常足故此窳偷生而

亡積聚

此短也窳弱也言短力弱材不能勤作故朝夕取給而無儲峙也此音紫窳音庚

飲食還給不憂凍餒亦亡十金之家信巫鬼重淫
祀又曰吳東有海鹽章山之銅三江五湖之利江
東一都會也海外鯁人歲時來見

叙吳郡志者曰有太伯辭遜之遺風

志會稽郡者曰有夏禹勤儉之餘習

至元嘉禾志卷一

欽定四庫全書

至元嘉禾志卷二

元 徐碩 撰

城社

嘉興路

路城按舊經云羅城周回一十二里高一丈二尺厚一丈五尺子城周回二里十步高一丈二尺厚一丈二尺宋宣和年間知州宋昭年嘗更築德祐元年

守臣余安裕重修諮議劉漢傑董其役且增築保障聖朝至元十三年羅城平子城見存羅城元有四門東門舊曰青龍門後改為春波西門舊曰永安門後改為通越南門舊曰廣濟門後改為澄海北門舊曰望京門後改為望雲續又改為望吳而門又分為水旱門門各有樓惟澄海水門樓因徐珉作亂遂廢聖朝至元十三年後門樓亦間廢

路社壇舊經六子城西北一里八十步今在澄海門內
西北一百步

松江府

府城舊為縣城周回一百六十丈高一丈二尺厚九尺
五寸後無之宋紹興乙亥歲酒務鑿土得唐燕胄
妻朱氏墓碑以咸通八年窆於華亭縣城西一里
鄉名修竹是唐之置縣固有城矣廢興之由不得
而詳焉縣境內西南稱南城亦不可曉

古城在華亭縣西六十里按祥符圖經所載也今未詳所在

府社壇舊為縣社在華亭縣西北二里

嘉興縣

縣城按舊經云周回二百二十五步宋淳熙間僅餘一百步今皆無之矣

槁李城在縣南四十五里高二丈厚一丈五尺後廢按舊經故戰場在縣南四十五里夾谷中即秦長水

縣古樛李城也史記載吳王傷指卒於此吳記曰
谷中有城故由拳縣治也即吳之柴辟亭神異傳
曰由拳縣秦長水縣也始皇時縣有童謠曰城門
當有血城陷沒為湖有老嫗聞之憂懼且往窺城
門門侍欲縛之嫗言其故嫗去後門侍殺犬以血
塗門嫗又往見血走去不敢顧忽有大水漲欲沒
縣主簿令吏入白令令見吏曰何忽作魚吏又曰
明府亦作魚遂乃淪陷為谷矣因曰長水城水曰

谷水也

射襄城在縣東北三十里後廢

何城去縣一百里吳王所築後廢

東顧西新南于北主四城嘉禾百詠注云吳越戰爭時
所築後廢

縣社壇舊在縣西南一里一百三十步後移在精嚴寺
前壇宇廢祀宋寧李時習修之有舊碑沒於智井
中今止存敗屋為鋪軍所據

海鹽縣

縣城周回一百七十步高一丈二尺五寸厚一丈後廢
古城在縣東南五十步

歟城在縣西北一十八里周回一里今止有歟城橋城
不存

故邑城在縣東北三十六里周回半里

縣社壇在縣西南半里

崇德縣

縣四城在邑境者三

官城屬鹽官

傳皆吳王所築遺址尚存

何城在縣西二里晏城在縣東北二十里萱城在

縣東三十里張堯同賦何城曰報越心何壯貪齊
意已輕忠言殊不聽何用築斯城

縣社壇在縣西二百步入門而南有齋廳三楹廳之南

五壇壇各有三級

風伯雷雨師

繚之以牆廳值宋政和

間重修社壇碑記磨滅幾不可讀大率全備勅牒
之語勅牒則盡述江東提舉沈延嗣奏請之辭當

時按式圖鏤版行下故式圖刻在碑首歷年雖久
壇制如式

坊巷

錄事司

迎年坊在春波門內

名義舊名春波今改是名蓋取迎青帝於郊祈福
豐年之義

正興坊在朱巷

名義舊名永興後改是名蓋取經正則庶民興之
義

登春坊在春波門內

名義通春波門故取熙熙然如登春臺之義

宜民坊在嘉興縣前

名義通嘉興縣故取豈弟君子宜民宜人之義

流虹坊在興聖寺西

名義巷有興聖禪院乃宋孝宗毓聖之地故取華

渚流虹女節感而生少昊之義

好德坊在鹽倉巷

名義巷有晉歌妓蘇小卿之墓故立是名欲使人知有好色不如好德之義

通津坊在府東灣

名義坊近水故立是名

聯魁坊在倪家橋

名義舊名褒孝以宋嘉定十一年里人有陳姓第

四子者剖心藥親之疾特立此以褒其孝壬寅冬
郡守倪祖常改是名

蘭錡坊

名義宋于太尉居焉故取吳都賦陳兵而歸蘭錡
內設之義

碧漪坊在嘉興縣西北

名義舊曰集賢通天心湖故改是名

集僊坊

名義巷通隱真道院因仙人劉高嘗至此故立是
名蓋效唐人以集仙名館之義

青緇坊

名義宋胡安撫居焉安撫名與可子孫皆把麾故
取東郭先生傳青緇之義

環圍坊

名義在府後門之東偏通回環于城之路詩云出
其圍闔注圍曲城也故以此名

旌烈坊在郡治北

名義巷有郡神楊將軍廟故立此名以旌將軍之

休烈

聽履坊

名義西河上宋有王尚書希呂宅故取聽履上星

辰之句

卿月坊

名義宋有趙少尹宅故取卿士惟月之義

祥鱣坊

名義近郡文學廳故取楊震鶴雀銜三鱣之祥

杏壇坊

名義在路學前故取孔子杏壇絃歌之義

鳳池坊

名義宋有婁參政機府故標中書鳳池之榮觀

百福坊

名義巷通天慶觀故取旱麓受祖申以百福之義

封祝坊

名義巷通祥符寺乃宋時聖節祝聖之所故取華封人祝堯之義

介寧坊

名義俗曰陳婆兒巷婆媪乃婦人高年者之稱也故取介爾景福壽考且寧之義

尊耆坊

名義俗曰老人局故立此名蓋取尊事黃耆之義

率育坊

名義俗曰楊洗麤巷故立此名蓋取毛詩帝命率育之義

斯才坊

名義俗曰馬坊巷故立此名蓋取駟詩斯馬斯才之義

咸中坊

名義俗曰幢子巷乃宋刑人於市之所故立此名

蓋取呂刑咸中有慶之義

聚桂坊

名義舊名神童蓋市心有唐堯臣包時習與弟時中時飛俱中童科後徐聞詩又以童科第進士故也堯臣後人夢符震龍天麟又相繼擢第景定庚申請於郡改是名

豐衍坊

名義通慈濟倉故以是名

美俗坊

名義通瓦子故立是名欲以美汙俗也

靈光坊在驛巷

名義通靈光寺故立是名

移風坊

名義通西瓦子故立是名欲移風易俗也

鄉道坊

名義在河道人巷口故以是名

通闡坊

名義在府後橋之西偏通大市故取吳都賦橫闡闡而流溢之義李周翰注曰闡闡乃市門也

織雲坊

名義通蔡織紗巷故立是名蓋取天孫巧織雲錦裳之義

燕春坊

名義巷通酒庫熙春樓故立是名蓋取遊燕之義

四騏坊

名義宋有馬太尉定遠居焉故立是名蓋取毛詩
方叔率止乘其四騏之義

鳴社坊

名義通社壇李蕭遠運命論里社鳴而聖人出是
郡為宋孝宗毓聖之地故因社名坊

輕裘坊

名義宋竇安撫居焉竇常帥襄陽故立是名蓋取

羊祜輕裘緩帶之義

通明坊在醋坊橋

名義舊在顧市橋後移於此路通南門因取離明之義

爰穡坊

名義俗曰糖巷因取土爰稼穡稼穡作甘之義

勸善坊

名義通咸中坊刑人之所尚書多方云殄戮多罪

亦克用勸孔子傳曰戮衆罪亦能勸善因立此名
暨容坊

名義通南營因取禮記玉藻戎容暨暨之義

天祿坊

名義在石獅子巷天祿辟邪乃獅子之類也故以

是名

閱武坊

名義通教場因取春秋大閱之義

歸鶴坊

名義舊曰華表後改是名蓋取丁令威去家十年
今始歸之義

清瑞坊

名義南通澄海門因取五百年海清瑞應之義

格真坊

名義通崇道宮因取感格上真之義

向葵坊在府治前

名義以其東嚮故取葵花向太陽而開之義

依蓮坊

名義通節推廳因取泛綠水依芙蓉之義

望恩坊

名義巷口之西有橋曰望恩故以此名

寶花坊

名義路通寶花寺因以名

皇華坊

名義宋浙西提舉任清叟居於此故立是名蓋取
皇華使臣之義

廣平坊

名義通廣平橋因以名

擁麾坊

名義宋有陳知軍宅故立是名

敷閏坊

名義在油車巷故以是名

崇梵坊

名義通兜率寺故以是名

欽祐坊

名義通天寧寺欽奉宋徽宗香火是為祐陵故以

是名

遺愛坊

名義有普寧王廟古傳嘉興縣令有善政天降一
銅棺蓋自開縣令入焉吏挽留之遂折臂故名遺

愛

六一坊

名義通天慶觀取東坡天慶觀賦六壯一穉之義
或謂六一居士後人居焉或謂宋陳賢良為東坡
六客之一世居白牛因名此以表之

政桴坊

名義在王鞞鼓巷故取善政致和猶桴鼓之義

阜通坊

名義通稅務因取周禮商賈阜通貨賄之義

金佗坊

名義舊通趙郡王府因取王印金索佗之義

燕支坊

名義通燕支橋因以是名

澄觀坊

名義通楞嚴十六觀堂因以名

繪麟坊

名義通金山大王廟大王即霍光也因取繪形麟閣之義

東陵坊

名義巷有石井欄象瓜俗曰甜瓜井因取東陵侯種瓜之義

繡衣坊

名義宋延安撫居焉延持使節故立此名以表繡衣之榮

瑞龜坊

名義通精嚴寺嘗獲靈龜故立此名

流化坊

名義通水纂橋水乃流動之物故名流化

興賢坊

名義在貢院前因取賓興賢能之義後因鄭守定
重修貢院而去之改立興賢館今皆廢

松江府

顯善坊在府東南二百五十步

勸義坊在府西南五百四十步

名義宋有縣令楊潛因邑有孝義者特表之以感

化里俗云

石獅巷在府東一百二十步

名義巷有石獅故以名

石條巷在府東六十步

倉橋巷在府東一百步

名義舊有米倉在巷北因以名

郭門巷在府東一百七十步

名義巷以西曰坊郭東曰附郭今名楊賣柴巷

鹽倉巷在府西一十步

廣明橋巷在府西四十步

前巷在府西六十步

後巷在府西八十步

亭橋巷在府西一百三十步

東私路巷在府西二百五十步

西私路巷在府西二百六十步

福順廟巷在府西三百步

莫家巷在府西三百五十步

竹木巷在府南二十步

城隍廟巷在府南二十步

廟巷在府南六十步

金山忠烈廟巷在府南七十步

石碑巷在府南八十步

紀家巷在府東南一百三十步

毬場巷在府東南一百五十步

石幢巷在府西南一百五十步

童家巷在府西南一百八十步

陸家巷在府西南二百三十步

丘家灣在府東北一百八十步

田家灣在府西南三百五十步

海鹽縣

字民坊在縣前

名義縣令乃字民之官故以名

聞琴坊在縣東南

名義取宓子賤單父鳴琴之義

宣化坊在縣西

名義前漢董仲舒策云縣令所使承流宣化也故以名

定民坊

名義取易履卦辨上下定民志之義

衆安坊

熙春坊

迎恩坊在縣西柵

名義凡恩詔必於此地述之故以名

起潛坊在福業院前

名義福業院有龍湫因取起潛龍之義

喜雨坊在福業院前

名義福業觀音院乃禱雨之所因取春秋喜雨有志乎民之義

甘泉坊

是邑舊有坊十名曰海瑞海倉海晏海康海清海安海豐海熙海潤海阜聖朝至元乙酉縣尹顧泳改今名

崇德縣

狀元坊在崇福寺西趙家巷今廢

名義因狀元沈徽學舊居此因以名

五桂坊

名義以莫氏五子登第建又有蔡氏兄弟居是坊
故又立桂華里以榮之

襲桂坊

名義宋陸氏兄弟子姪聯登第建

榮桂坊在塘之東岸入縣庠路今廢

至元嘉禾志卷二

欽定四庫全書

至元嘉禾志卷三

元 徐碩 撰

鄉里

錄事司

五福鄉管里四

羅 廟巷 望 廣平

嘉禾鄉管里四

作兒 朱巷 紙行 華表

由拳鄉管里四

甘露 社壇 南宮 秤花

勸善鄉管里四

青雲 輪王 棲真 東塘

時清鄉管里一

甘露

右五鄉凡十有二界

天慶上界

天慶下界

鹽倉上界

鹽倉下界

大悲東界

大悲西界

府東界

府西界

韭溪界

薛嚮界

南宮界

南菓子界

松江府

集賢鄉在府西北二十里三保五村管里四

集賢 萬安 美賢 清德

華亭鄉在府東北四十里三保七村管里二

華亭 祈亭

修竹鄉在府西九十里三保十二村管里三

濮陽 儀鳳 驅塘

考證舊傳云修竹本谷陽鄉廢易年月未詳

胥浦鄉在府西南五十里三保九村管里五

胥浦 壇浦 平江 朱涇 治宅

風涇鄉在府西南六十里三保八村管里三

風涇 涂繆 養民

新江鄉在府北七十里三保十二村管里二

新江 崧宅

北亭鄉在府東北八十里四保十六村管里三

崧子 北亭 封林

考證唐顧府君墓誌葬北平鄉以道里考之北平
今北亭也

海隅鄉在府西北九十里四保十一村管里二

蘊土 漢成

高昌鄉在府東北一百二十里九保十五村管里四

高昌 盤龍 橫塘 三林

金匱縣志卷之三
長人鄉在府東九十里六保十二村管里三

長人 將軍 高陽

白砂鄉在府東南一百二十里三保十村管里三

白砂 九稜 橫林

仙山鄉在府東南三十里三保六村管里六

仙山 顧亭 新涇 杯湖 少平 臨湖

考證唐丘府君墓誌葬昌唐鄉以道里考之昌唐

今仙山也

雲間鄉在府東南一百里四保十村管里四

招賢 白苧 雲間 小平

右十三鄉鄉有五十二保保又分為一百三

十三村

按祥符圖經元豐九域志華亭管十三鄉寰宇記云舊十鄉今十七鄉考

今之諸鄉與舊

經九域志同

嘉興縣

德化鄉在縣東二十里管里四

瓜舍 高豐 吳涇 朱涇

胥山鄉在縣東六十里管里八

石雲 葛趙 三捍 墓 舊廟 當湖

姚塔 錢村

感化鄉在縣東三十里管里三

秋塔 杜莊 籬林

移風鄉在縣東五十里管里三

葛澳 漢全 秋澳

履仁鄉在縣南五十里管里五

張村 張宅 秋塔 東周 楊滙

新豐鄉在縣東南四十里管里七

松陽 莊與 蕭墓 莫村 顧墓 嶽朴

柳莊

永豐鄉在縣東南二十里管里四

朱墓 衢林 戴澳 清墓

白苧鄉在縣南一里管里四

六里 磨塘 南界代 北界代

大彭鄉在縣南一十里管里四

朱塔 刀林 陳浦 梅會

長水鄉在縣南三里管里三

桃花 梨會 落塘

象賢鄉在縣西三里管里三

至德 深葉 桃花

考證象賢在唐為來蘇鄉邑仁里宋乾道間村人

掘得唐碑一片乃乾符五年褚府君墓碑正在象

賢二十二都

嘉會鄉在縣南一十二里管里四

魯輿 梅會 朱巷 張滿

靈宿鄉在縣西北一十二里管里四

關

雲泉鄉在縣西北三十五里管里二

王安 莊塔

柿林鄉在縣西北三十里管里二

桃莊 宋耆

伏禮鄉在縣北二十里管里二

九里 吳會

永樂鄉在縣西北十五里管里二

朱涇 羞墓

思賢鄉在縣北三十里管里二

吳後 平塔

遷善鄉在縣東北四十五里管里五

松墩 曹澳 楊澳 江涇 斜塘

麟瑞鄉在縣東北三十六里管里三

殿林 射城 魏塘

永安鄉在縣東北五十里管里三

黃巷 胡受 巡院

奉賢鄉在縣東六十里管里三

白牛 屠涇 新城

右二十二鄉鄉別為四十都

海鹽縣

海鹽鄉在縣東南郭下管里四

長年 東城 聞琴 大周

考證唐開元間劉府君墓誌云葬縣南三里地號
烏夜鄉名海鹽又太和元年杜府君墓誌云葬甘
泉鄉夜原二誌皆文宗時歲次前以烏夜為海鹽
鄉後以烏夜為甘泉鄉抑亦當時鄉分有改隸耶
烏夜啼古琴曲名縣今有聞琴里舊縣學在烏池

鄉後併為海鹽鄉

甘泉鄉在縣西南管里四

永和 瑞井 馴雉 東姜

開濟鄉在縣西一百步管里四

歟城 保壽 合穗 稟化

大易鄉在縣西北一十五里管里四

新進 淘涇 擊壤 蕭墓

德政鄉在縣西南二十里管里五

金牛 延德 樵李 斤林 歸仁

長水鄉在縣西一十八里管里四

橫山 徐涇 招賢 甘雨

永寧鄉在縣西二十里管里四

秀歧 崇教 永昌 崇仁

考證舊為永泰後改是名

武原鄉在縣北二十里管里四

永福 弦歌 鄰鶴 馬廐

華亭鄉在縣北五十五里管里五

招賢 新安 魚所 谿里 烏社

齊景鄉在縣北四十里管里五

當湖 惠安 埭隆 下亭 羊墅

考證有齊景公廟在馬或云孟子載齊景公曰吾
欲觀於轉附朝儻遵海而南也以景公嘗遊於此
舊有碑磨滅不可讀又唐貞元十四年太子左贊
善大夫吳郡陸府君夫人汝南縣君周氏墓誌銘

云附於嘉興縣東界海鹽縣齊景鄉青墩原西北
塋則齊景鄉舊有青墩原矣

右十鄉鄉別為二十三都

按九域志上海鹽十有一鄉後為十鄉唐

德宗貞元十一年八月六日蘇州刺史于順奏以所管十鄉為十五鄉昭宗乾寧五年以戶口數少併為十鄉

崇德縣

南津鄉在縣西郭下管里八

孝義 清化 大義 桂華 嘉福 長營

進安 永豐

語兒鄉在縣東郭下管里六

垌城 邵林 孝義 南陽 通賢 宣化

考證漢法十里一亭十亭一鄉凡封侯則視功大小亭鄉縣郡各有差或謂語兒在漢為亭棘終古之封止是亭侯迺證以孟康吳南亭之注是蓋不然春秋戰國時樵李禦兒無望地縱橫廣袤亦相等秦易樵李名由拳且以為縣則禦兒為鄉無疑

武帝銳於賞功終愜於後故襲爵者少纔六年莊
侯終古死而國除矣孟康魏人恐於吳地不能訂
其詳吳南亭者特指語兒十亭之一耳

募化鄉在縣東三十五里管里四

義政 尊賢 永新 清平

千金鄉在縣東六十里管里四

新政 大麻 得義 靚谷

崇德鄉在縣東北一里管里六

和義 知和 神墟 上莫 石闕 崇新

千乘鄉在縣東北一十二里管里九

紀目 羔羊 上蔡 遊屯 錢林 令野

五社 雙林 新城

考證吳王夫差養兵放牧於此故名

積善鄉在縣西北二十里管里八

宣風 仁化 嘉善 生賢 崇政 萬年

大通 西河

石門鄉在縣北二十里管里六

六塔 長濠 通賢 上林 從信 含仁

保寧鄉在縣三十里管里四

尊賢 鵲宿 白馬 義安

清風鄉在縣東北四十里管里四

化逸 清和 高田 衆安

永新鄉在縣東北四十九里管里四

集賢 靜安 翁林 下塔

梧桐鄉在縣東北四十九里管里五

梧桐 鳳鳴 永泉 邵莊 善衆

考證集賢舊經云二鄉接境有官窰父老傳正吳越分疆之地今有走馬岡洗馬池在二鄉又有平原之野

右十二鄉鄉別為三十一都都又分為十保

按古志縣元管七鄉又窰宇記云九都

鎮市

松江府

青龍鎮在府東北五十四里

考證舊為海商輻湊之所鎮之得名莫詳所自惟朱伯原讀吳郡圖經云昔孫權造青龍戰艦置之此地因以名之宋景祐中置文臣理鎮事以右職副之後止文臣一員政和間改曰通惠高宗朝復為青龍今鎮治延袤有學有獄無復海商之往來矣

嘉興縣

魏塘鎮在縣東三十六里

白牛鎮在縣東北六十里

考證宋賢良陳舜俞為東坡六客之一嘗居於此
自號白牛居士故以名舊為市聖朝至元十三年
立為鎮

陶莊市在縣北

新城市在縣西二十七里

永樂市在縣西南二十七里

海鹽縣

寧海鎮在縣東

考證唐天寶十年太守趙居貞置宋淳化二年移
置今廢

澉浦鎮在縣西南三十六里

廣陳鎮在縣東北九十里

當湖市在縣東北四十里

半邏市在縣西北三十五里

鮑郎市在縣西南五里

崇德縣

青鎮市在縣東北五十八里與烏鎮市相對分東西岸
東曰青鎮屬本縣西曰烏鎮屬烏程縣民物蕃阜
塔廟橋道宅地園池甲他鎮戍

語兒市在縣東南隔運河三百步後均為縣市矣縣市
即古義和市也

石門市在縣北二十二里

考證市有二張居焉鄉里稱善人篤於教子諸孫
悉有文聲

皂林市在縣北四十里

鳳鳴市在縣東北四十里

考證市居徐族為多登進士科者相望視他聚落
為僅有

洲錢市在縣西北二十七里

考證宋南渡初士大夫來寓者殆二十家贈太師
申國趙公不求父子寓踰一紀申國自號守一道
人慶公善應字彥遠詩翰尤妙丞相福王實生於
寺橋南之民舍蘇計屬師德仁仲呂顯謨正己仲
發迭主詩盟即祇園精舍為簪盞之所故詩人沈
文伯有翠娥環坐憶洲錢之句

至元嘉禾志卷三

欽定四庫全書

至元嘉禾志卷四

元 徐碩 撰

山阜

松江府

崑山在府西北二十三里高一百五十丈周迴八里

考證陸士衡贈從兄士況車騎詩云髣髴谷水陽
婉孌崑山陰注引陸道瞻吳地記曰海鹽縣東北

二百里有崑山陸氏父祖葬焉輿地廣記云崑山陸氏之先葬此後機雲兄弟有辭學時人以玉出崑岡因名之征北將軍陸禕墓在山巔

機山在府西北二十里

考證因陸機得名山下有村曰平原亦因陸平原名之平原內史即機也千山圓智寺記云所謂機山者往往排巒別嶺槩為陸氏之家山總而名焉橫雲山在府西北二十三里高七十丈周迴五里

考證本名橫山唐天寶六年易是名與機山相望
僅五里許或云因陸雲名之有白龍洞在山頂之
西南其深不可計山下有祭龍壇

澱山在府北六十里薛澱湖中周迴三百五十步高三
十丈

考證山形四出如鰲上建浮圖下有龍洞屹立湖
中亦落星浮玉之類傍有小山初年僅兩席許久
之寢長寺僧築亭其上榜曰明極

金山在府東南九十里周迴十里高一十七丈

考證吳地記云有平坡可容二十人坐北有寒穴
其泉甘香

余山在府西北二十四里高八十丈周迴一十八里

考證舊傳有姓余者居此因名焉按姓苑余姓出
南昌

千山在府西北二十九里高七十丈周迴五里

考證舊圖經云昔有千氏居此圖智寺記云茲山

後皆千氏所有故以為名

薛山在府西北二十四里高九十丈周迴七里

考證吳地記云薛約道居此因以為名

城山在府北二十里高八十丈周迴五里

考證舊經云山狀周環如城因以為名

細林山在府西北一十八里高五十丈周迴七里

考證本名神山唐天寶七年易是名

土山在府西北二十五里高二十丈周迴一里九十步

秦山在府南六十里高二十八丈周迴一里九十步

達岸山在府東南一百六十里海水中周迴八里高二

十五丈

竹嶼山在府東南一百八十里海水中周迴六里高五

十丈

許山在府東南二百五十里海水中周迴五里高五十

丈

簞山在府北三十里周迴三里高五十丈

遮山在府東南七十里周迴二里高五十丈

浮山在府東南一百里海水中周迴一里一百步高十

丈

蘇山在府東南一百六十里海水中周迴一百五十步

高二十丈

巖山在府西北三十七里周迴四里二十二步高四十

丈

鳳凰山在府西北二十八里

陸寶山在府西二十五里

考證本陸氏家山

嘉興縣

胥山一名張山在縣東南三十里高一十五丈周迴二里

考證舊經云伍子胥伐越經營於此地故名胥山
按史記吳太宰嚭讒子胥吳王賜子胥劍因自剄
死吳王聞之取子胥尸盛以鸛夷革浮之江中吳

人憐之為立祠於江上因命曰胥山水經所載與此畧同吳錄曰胥山在太湖邊去江不百里故曰江上又曰吳王殺子胥投之於江吳人立祠於江上故名胥山寰宇記曰蘇州吳縣有胥山在縣西四十里吳地記曰夫差十二年既殺子胥死後浮之君臣臨江作塘設祭奠百姓緣為立祠故張堯同詩云馬革浮尸去君王太忍人此山空廟貌何以勸忠臣又唐杭州刺史盧元輔有胥山銘而言

子胥廟貌故今杭州之吳山亦名胥山然則胥山
非一矣今此山左有石龜凝望涇水自高而下有
欲趨赴之態昔風雨中有老農見其行疑其為怪
潛命工鑿傷一目右有吳王磨劍石長可三四丈
直指西下劍痕在焉宋隆興元年觀察李君有請
於朝捐已俸以營此山因有之後李氏廢守臣復
有請於朝撥隸郡學而郡學又以荒山皆石無出
產利竟為樵牧之地後鄉人士陳氏鑿石結廬讀

書於此名胥山書堂遊覽者多留題今堂猶存
父山在縣西南五十七里高十大丈周迴七里

考證昔道士父基隱居學道於此後尸解焉因以
名

海鹽縣

故邑山在縣東北三十六里高八十丈周迴二十里

考證輿地志云山下有城唐志云舊縣治漢順帝
二年因縣淪陷為湖移置此山下後為故邑巡檢

司

秦住山在縣南一十八里高一百六十丈周迴二十里
考證輿地志云秦始皇遊登此山因以名之後魏
酈道元注水經云縣南有秦望山秦始皇所登以
望東海故得名焉晉樂資九州志曰縣有秦逕山
秦始皇逕此美人死葬於山下有美人廟考舊圖
經則為秦住今會稽則有秦望始皇刻石紀功之
所

望虞山在縣東南二十二里高九十丈周迴一十二里
考證舊經云以隔海望會稽上虞縣因名

長牆山在縣南三十五里高八十丈周迴一十九里

考證按舊經云秦始皇東遊登山望海以其孤聳
遙望勢如堵牆因名

泊櫓山在縣南三十五里高一百五十丈周迴四十里
考證輿地志云秦始皇東遊候潮渡海泊櫓此山

下因名

金粟山在縣西南三十五里高九十八丈周迴六里

考證一名六里山按吳地志云有石篆書三十八
字天冊元年刻碑舊在知縣廳後廢山有廣惠禪
院

白塔山在縣東南二十里海中

考證山上有白塔因名舊有港通魯浦名曰白塔
潭海舟多泊焉潭塞舟皆歸澈浦北戶錄曰唐至
德初徐正字疑於海鹽縣白塔山沙渚之上得桃

核片可容一升則知草木在山海間有瑰形殊質者多矣宋建炎四年春賊將徐大刀艤舟山下見林木茂盛有兩道人奕棋登岸就之不見遂不擾海邑而去

夾山在縣西南三十五里高七十丈周迴七里

考證舊圖經云山居金牛金粟二山之間因名

金牛山在縣西南五十里高一百三十六丈周迴四十里

考證吳地志云昔有金牛村民臯伯通與弟隨之牛穴此山而入二人鑿山而入山崩兄弟皆死遂名金牛洞寰宇記亦名骸山九州要記古有金牛入此山臯伯通兄弟入鑿此山取牛山頽二人同死穴中因名會骸山

沈山在縣西南七十里高三十五丈周迴七里

考證舊圖經云宋臨海南陽二郡太守沈景葬於此因名唐屬蘇州海鹽縣昭宗大順中割歸杭州

今沈山即鹽官縣硤石鎮之東山

陳山在縣東北四十里高八十一丈周迴一十五里

考證按舊經云有龍潭顯濟龍王廟是也百姓禱之隨有感應郡中每遇旱暵取水祠之雨即霽霈
宋建炎初加封是名

橫山在縣西闕三十里

考證顧況所居唐縣令劉長卿有過橫山顧山人
詩山有寺曰禪寂院

雅山在縣東北三十六里

考證山多怪石俗呼為惹山地中得碑記云雅山

紫雲山在縣南三十二里

豐山在縣南一十八里高一百三十丈

考證耆老相傳云秦始皇屯兵於此山有石屋三
所昔有發之者蜂蟄蛇虺不敢近

崇德縣

陳山在縣西北三十里高一十三丈周迴一里

笈山在縣東六十里高一十三丈五尺周迴二里

江海

松江府

松江在府北七十里

考證其原始於太湖口而東注於海書曰三江既入震澤底定韋昭以為三江者松江浙江浦陽江是也今浙江浦陽江與震澤不相入韋說非也續吳郡圖經據鄞善長云松江自湖東北逕七十里

江水分流謂之三江口吳越春秋云范蠡去越乘舟出三江之口入五湖之中謂此也庾仲初揚都賦云云太湖東注為松江下七十里有水口分流東北入海為婁江東南入海為東江與松江而三今松江自吳江縣過甫里逕華亭入青龍鎮自湖至海凡二百六十里若夫有新江舊江之別者宋嘉祐中吳中水災時李兵部復圭為轉運使韓殿省正彥宰崑山開松江之白鶴匯如盤龍之法其

後崇寧中漕使邾亶又浚治之遂為民利嘗詢之
父老所以然者松江東注地曲折自白鶴匯極於
盤龍浦環曲而為滙不知其幾水行迂滯不能逕
達於海今所開松江自白鶴匯之北直瀉震澤之
水東注於海畧無迂滯處是以吳中得免水患

滬瀆江在府東北一百一十里

考證吳郡記松江東瀉海曰滬海亦謂之滬瀆廣
韻滬水名也白虎通發源而注海曰瀆陸魯望漁

具詩序列竹於海澨曰澨吳之澨瀆是也皮日休
吳中苦雨詩全吳臨巨溟百里到澨瀆海物競駢
羅水怪淨滲漉即此地也江側有澨瀆壘蓋虞潭
素崧防海之處兩旁有東西蘆浦瀉於瀆江

海在府東八十里南九十里

考證是郡東南並鉅海自柘湖墮塞遂置堰以禦
鹹潮往來宋政和中提舉司官興修水利欲涸亭
林湖為田盡決隄以泄湖水是郡地勢東南益高

西北益卑大抵自三泖五浦下注松江以入於海
雖決去諸堰湖水不可泄鹹水竟入為害於是康
南四鄉為斥鹵之地民流徙他郡中間州縣官雖
知其害復故隄堰獨留新涇塘以通鹽運海潮汐
衝突塘口歪濶三十餘丈鹹水延入蘇湖境上乾
道七年八月右正言許公克昌請於朝時太博丘
公密除秀州陸辭之日因奉孝宗聖訓亟來相視
以運港水勢較新涇為稍緩遂移築新涇堰於運

港後堰外隨潮沙凝牢不可壞三州之田始得免
鹹潮浸灌之患

海鹽縣

海在縣東五里南纔二里

考證與明越二州相對者老云深夜籟寂時越上
鷄犬之聲相聞海瀕舊有鎮海樓海月樓龍王廟
有岡十八條為海潮之限因潮汐漂蕩日久今皆
為魚龍之宮無復存矣岡僅存一在縣南五十步

南抵澈浦三十六里番舶萃焉東北抵乍浦商舶
間至

湖泖 水附

錄事司

天心湖一名天星湖在縣東五十步

考證舊經云其池東西二十四丈南北濶五十四
丈池口濶五十四丈舊傳亦係秦始皇掘地為水
之所水草不生亦一異也舊有文宣王廟在其前

今已廢易

松江府

薛澱湖在府西北七十二里

考證湖之中有山湖之西有小湖南接三泖其東大盈浦其北趙屯浦蓋湖所以受三泖及西南諸港之水自二浦以瀉於松江也舊圖所不載止有小湖在西北六十里周迴三里吳郡圖經云西北有白蜆馬騰谷瑋瑁四湖舊圖谷湖在縣西北五

十三里馬騰西北六十里白蜆西北七十里今白
蜆湖在長洲界所謂馬騰谷瑋瑁相去五七里間
澱湖周迴幾二百里茫然一壑不知孰為馬騰湖
孰為谷湖也此湖古來鍾水之地近者如白蜆湖
皆成園田湖之四旁下有築隄為田者歲有水潦
則瀦水者益便矣

錡湖一名洋湖在府西北三十五里周迴二十里

考證舊經云湖有陸錡宅因以為名又府東南六

十里亦有洋湖徑十餘里後皆為蘆葦之場

鶯竇湖在府東三十里周迴五里

來蘇湖在府南七十里周迴一十七里

唳鶴湖在府南四十五里周迴五十六里

永興湖在府南四十里周迴三里

考證右三湖載之祥符舊圖今未詳所在

三泖

考證按廣韻泖水名華亭水也陸龜蒙詩曰三泖

鯨波魚莖動注曰吾遠祖士衡對晉武帝三泖冬
溫夏涼蓋謂此也祥符圖經谷泖縣西三十五里
周迴一頃三十九畝半古泖縣西四十里周迴四
頃三十九畝今泖西北抵山涇南自泖橋出東南
至廣德又東至當湖又東至漸海塘而止朱伯原
續吳郡圖經曰湖在華亭境泖有上中下之名泖
之狹者猶且八十丈又按海鹽之蘆瀝浦海鹽即
武原也行二百餘里南至於浙江疑此即谷水故

道水經以為入海而此浦入江蓋支派之異也俗傳近山涇為下泚近泚橋為上泚或者其與陸士衡朱伯原之論合按縣圖又以近山涇泚益圓曰圓泚近泚橋泚益濶曰大泚自泚而上縈繞百餘里曰長泚此三泚之異也或以須顧泚謝家泚為三泚此二者在縣之東南一陂澤爾與古所謂三泚者相去五七十里殊不知泚自有上中下之名也

須顧泚在府東南二十里

謝家泚在府東南二十里泚北有泚涇

谷水在府南長一百五十步

考證陸士衡詩髣髴谷水陽婉變崑山陰陸道瞻

吳地記云海鹽縣東北二百里有長谷昔陸遜陸

凱居此谷水東二里有崑山父祖葬焉水北曰陽

山北曰陰則此水在崑山之北也寰宇記谷名華

亭谷水下通松江祥符圖經華亭谷水東有崑山

元和郡國圖志在縣西三十五里朱伯原續吳郡
圖經本之酈善長云松江東南行七十里入小湖
自湖東南出謂之谷水南接三泖陸士衡詩所云
即此水也

至元嘉禾志卷四